

յամեալ եղև սպասաւոր հրեշտակն . և յորժամ հարցեալ եղև ի Լուսաւորչէն պատճառ յամելոյն, ասէ՛ այսօր տօն մեծ է իմոյ դասուն որ ի յերկինս, համբարձաւ Քրիստոս, այսօր և մեր դասն հանգեաւ, և յամենայն ամի զայն աւուր տօնն կատարեմք . և սուրբ Լուսաւորիչն ելեալ ի վերապէն ուսոյց զայն Հայաստանեայց Եկեղեցւոյն» (Տար. 2. էջ 682):

Համչէնցիները կը համարին թէ Քրիստոս համբառնալու ժամանակ ինն օր ճամբորդած է, իւրաքանչիւր օր մէկ հրեշտակի մօտ մնալով, վասնզի իւրաքանչիւր երկնքի վրայ մէկ հրեշտակ պէտք է (Հ. ամ. 1931, էջ 239):

10. Քրիստոսի համբարձման ժամանակ Ս. Կոյսին ներկայութիւնը. — Ղուկ. ԻԴ. 50-53, Գործք. Ա. 9-12, ուր կը պատմուի Քրիստոսի համբարձումը, չի յիշատակուիր Ս. Կուսին ներկայութիւնը Ջիթենեաց լեռան վրայ. բայց աւանդութիւնը կը հաստատէ թէ Տիրոջը համբարձման ժամանակ Ս. Կոյսն ալ ներկայ եղած է և զանազան մանրամասնութիւններ կ'աւելցընէ և կը պատմէ թէ՛ երբ Յիսուս իր տեսութենէն թռչելով անյայտացաւ, Ս. Կոյս Մարիամ բարձրաձայն և յուզմամբ աղաղակեց ըսելով. «Որդեակ իմ, յիշէ զիս երբ կուգաս քու թագաւորութեամբդ, Որդեակ իմ քու բաժնուելէդ վերջ երկար մի՛ թողուր զիս» (Լ. Վ. Շ. էջ 230):

Ներսէս Լամբրոնացին իր «Բարեբանութիւն ներքողական զովորեալք ի համբարձումն Տառն Յիսուսի Քրիստոսի յերկինս» խորագրով ճառին մէջ ունի սրտառուչ հատուած մը այս աւանդութեան մասին զոր կը դնենք հոս նոյնութեամբ. «Մայրն՝ ուր խոցեցաւ յայն-